

ዓስቲሮ ማፃኣፖ ዓይያ ካሮ

ዓስቲሮ ማፃኣፖይዳ ኬኤዚነታ ዲማ ዲማ ማዲነቴ ባካ ፓርሴ ካኣቲ ባርጎ ዎዶና ናንጋ ቤዘይዳ ማዲነቴ ባኣዚ ማዳዛ፣ ባሼ ሃይሳ ደዲሺ ኬኤዚነቴህ ዴኤፒ ጫርሹሞና፣ ሃሣ ፔ ዴሮ ዒናፓ ናሽካያ ማዒያና ፔኤኮ ዴሮ ሞርካ ባይዙሞጉዲ ዓውሴ፣ ዓስቲሮ ጌይነታ ፔቴ ዓይሁዶ ላኣሊታፖ ጎኦባ ዔርቴያ ማዕስኬና ዛላኬ። «ፑሪሜ» ጌይነቴሞ ዔርቴያ ማዕ ቦንቾ ዓይሁዶ ዓሳ ቦንቻያ ዓኣኔ፤ ማፃኣፒላ ዬና ቦንቹሎኮ ዓይያና ዓይጎሮ ቦንቹነታያታቴያ ኮሺ ኬኤዛኔ።

ማፃኣፒላ ዲማ ዲማ ዓርቁ ባኮ

- ዓስቲሮኮ ጌኤሾ ማዒያ (1:1—2:23)
- ሃማ ዓይሁዶ ባይዛኒ ማሌህ (3:1-15)
- ዓስቲራ ዔያቶ ማኣዶም ሜርዴኪዮሴ ፆኦጮህ (4:1-17)
- ሜርዴኪዮሴኮ ቦንቹንቶ (5:1—6:14)
- ሃማ ሃይቃንዳጉዲ ሞጊነቴህ (7:1-10)
- ዓይሁዶ ዓሳ ፔጊዳ ሙኬ ሞርኮ ፆሊ ባይዜህ (8:1—9:19)
- ፑሪሜ ጌይነታ ቦንቾ ቦንቹያ (9:20-32)
- ዓርጻክሲሴና ሜርዴኪዮሴናኮ ዴኤፑሞ (10:1-3)

ጌኤሾ ዓስጻኖ ጌይነታዛ ካኣቲ ዓርጻክሲሴም ዋይዘ ዒጻህ

1 ዬና ዎዶና ካኣቲ ጻሪኪሲሴ ሂንዴ ዓጫፓ ዴንዲ ዒቶጲያ ሄላንዳኣና ዓኣ ጻኤታና ላማታሚ ላንካይ ማዓ ዓጪ ዋይህያኬ።

2 ዒማና ካኣቲ ዓርጻክሲሴ ሱኡሳ ጌይነታ ቤዛ ዓኣ ካኣቱሞ ማኣራ ናንጋኔ።

3 ዒዚ ካኣታዴነቴ ሃይህሳ ሌያና ዒዛኮ ደንዘ ማዕ ቢታነታ ዓኣ ዓሰንታ ዲማ ዲማ ዓጮ ዋይህ ዓሰንታም ቢያ ዴኤፒ ሙኡዚና ዑሽና ኬሊ ዒ ጊኣጊሽኔ፤ ዬያ ሙዎ ኬሎና ፓርሴና ሜዶኔ ዓጮናኮ ፆሎ ዓሰ ዓይህ ዓሳ፣ ዲማ ዲማ ሱኡጎነታ ዲማ ዲማ ዓጮ ዋይህ ዓሰንታ ሙኬኔ።

4 ካኣቲ ዬያይዲ ላሆ ዓጊኒ ሄላንዳኣና ዒዛ ካኣቱሞጋራ ዓኣ ቆሎ ሚርጉሞነታ ካኣቱሞና ዒ ቦንቹነታ ቦንቾሞ ፔጋሲ ዳዌኔ።

5 ዬካፓ ሃህ ካኣቲ ዒ ካኣታዲ ዴዒ ዓኣ ካታሚሎ ሱኡሳይዳ ናንጋ ዓሰም ቢያ፤ ጌይፆ፡- ፆርጎጮነታ ማንቆነታም ቢያ ሜሊ

ሙኡዚንታ ዑሽንታ ኬሊ ገአጊሹኔ፤ ካአቱሞ ማአሮኮ ተኢያ ጋራ ዲማ ዲማ ቱኮና ሚህሂ ዓአንቲ ዒኢካ ዬና ሙዓ ገአጊሽንቲኔ፤ ዬይ ሙዓ ላንካይ ኬሊ ሄላንዳኣና ሙይንቲ ጎይህ ዳዔኔ።

6 ዬና ዲማ ዲማ ሚያ ቱኮና ቤዜላ ቦኦሪ ፑኡታ ጉኡዲሲ ሱኪ ኮሸና ዲንኪ ጎኡቦ ዓፒላና ሚዛጲሲ ጎኡቦናያኬ፤ ጎኡቦ ዓፒላ ጮልዔ ፓቲሌና ኮሸንቲያኬ፤ ሃሃ ሹቺ ቢራ ዓንገና ሱህ ጉኡሪ ኮሻዎ ሚዛጲ ሹቺና ገአጊሸና ቱርቱሪዳ ሱዲንቲ ዓአኔ፤ ዎርቄና ቢራ ዓንገናፓ ኮሸና ቃሚሂ ሻኣላ ቦኦሪና ዘቄና፤ ጨኢጮ ቡኒ ማላያንታ ዲንኪንታ ፖፖዓ ሚዛጲ ሹጮ ሂኢሂ ገአጊሸና ሳይይዳ ጌሂንቲ ጌሂንቲ ዓአኔ።

7 ዬያጉዲ ሃሃ ዎርቄ ዓንገና ኮሸንቲያ ዎሊ ማሉዎ፤ ዲማ ዲማ ዑሽ ዑሽኮ ዓንገና ዑዞ ዓሶም ዒንገንታኔ፤ ካአቲ ዒማና ፔ ኮሹሞና ዎይኖ ዑዞ ዑህ ዓአሂ ገአጊሹሂሮ ዎይኖ ዑዞ ኮሸ ዲቢኬ፤

8 ዓሳ ፔ ዳምቦ ዳምቦ ጎይያ ኮዔሂጉዴያ ዑሸካንዳጉዲ ካአቱሞ ማአራ ማዳ ዓሶም ካአቲ ኬኤዚ ዓይህኔ።

9 ዬይ ዬያይዲ ማዲንታኣና ጌኤሻ፤ ዓሰዲና ካአቱሞ ማአሮይዳ ላኣሎም ሙኡዚንታ ዑሽንታ ገአጊሹኔ።

10 ሙዎና ዑዞና ዓርቄንቲ ላንካሳ ኬሎና ካአቲ፤ ዓርቄክሲሴ ዎይኖ ዑዞ ዑሽኪ ሚሸኪ ዎዛዳዎ ሚሁማኔ፤ ቢዝታ፤ ሃርቦና፤ ቢግታ፤ ዓባግታ፤ ዜታሬንታ ካርካሴንታ ዓሸንቲ ካአቱሞ ማአራ ማዳያታንቲ ዔያቶ ላንካዎንሂ ዔኤሊ፡-

11 «ጌኤሻ፤ ዓሰዲና ካአቱሞ ማአሮ ማአዓሂ ማይንቲ፤ ሃሃ ቦንቸሮ ዓጎ ባኮዎ ቶኦካ ዓገንቲ ሃይካ ዬዓንዳጉዲ ኬኤዙዎቲ» ጌዔኔ፤ ካአቲ ዬያይዳሂ ጌኤሻ፤ ዓሰዲና ሚርጌና ሚዛጲታሂሮ ዒዛኮ ደንዘ ማዔ ቢታንታ ዓኣ ዓሶንታ ሹኤጮንታ ቢያ ዒዛ ዛጋንዳጉዲ ጌይኬ።

12 ጋዓንቲ ዔያታ ዬያ ካአቲኮ ዓይሂያ ዒዞም ኬኤዛዛ፤ ዒዛ ካአቲ ቤርቶ ሙኪያ ዒጻኔ፤ ዬይ ካአቲ ሚርጌና ዳጋሴኔ።

13 ጌኤሲ ዎጌና ዳምቤና ጌሰቲ ኩንሃ ጎይሂ ዔራያ ማዔ ዓሶ ያኦጪሂ ካአቲኮ ዔርቲ ማዳኬ፤ ዬያሮ ዬኖ ዎዶ ባኮ ዛሎ ፒዚሲ ዔራ ዓሶና ዎላ ዒ ዒማና ዘርታኒ ዓሶ ዔኤሊ ዔኪ ዬዔኔ።

14 ዬያታ ቢያ ዎዶ ዒዛ ዘራኒ ዳንዳዓ ዓሳ፡- ካርሸና፤ ሹታሬ፤ ዓዲማታ፤ ታርሸሹ፤ ማሬሴ፤ ማርሴናንታ ማሙካኔ ጌይንታያ ዒ ካአታዲ ዎይህ ዓጮይዳ ዳኤፒ ቢታንቶ ዓኣያ፤ ፓርሴና ማዶኔ ዓጮናይዳ ሱኡጌ ማዒ ማዳ ላንካይ ዓሲኬ።

15 ካአቲ ይዳቶ ዘራ ዓሶ ኮይሉ፡- «ታኣኒ ካአቲ፣ ዓርፄክሲሴ ጌኤሾ ዓሰፂኖ ሃይካ ዓኪ ይዳንዳጉዲ ታኣኮ ማዶ ማዶ ዓሶፓ ታኣኒ ዓይሢ ደካዛ ዒዛ ዒዒ ዓቲኔ፤ ሂንዳ ታኣም ከኤዙዋቲ፣ ዒዙ ታኣኒ ዋዴቲ ኮሺኪ ጋዓይ ዋጋ?» ጌይ ያኣጩኔ።

16 ይካፓ ዘራ ዓሶፓ ፔቲሢ፣ ማሙካኔ ካአቲንታ ዴኤፖ ቢታንታ ዓኣ ዓሶንታ ቤርታ ሂዚ ጌዔኔ፡- «ጎኔኪ፤ ጌኤሻ ዓሰፂኖ ቦርሲሴሢሢ ካአቲ ሌሊቱዋንቲ ዒዛኮ ደንዞ ማዔያ ቢታንታ ዓኣ ዓሶ ቢያኪ፤ ይዳ ሌሊቱዋንቲ ካአቲ ዋይሢ ዓጮይዳ ዓኣ ዓቲንቆዋ ቢያ ዒዛ ደውሲሴኔ።

17 ማይ ሃካፓ ሴካ ካአቲ ዋይሢ ዓጮይዳ ዓኣ ዓይጎ ላኣሊያ ጌኤሻ ዓሰፂኖ ማዶ ባኮ ቢያ ዋይዘዎ ዓኒ ቦሂሢ ዓርቃንዳኔ፤ ዓይታ ዓኒንሢ ኮራ፡- «ካአቲ ዓርፄክሲሴ ጌኤሾ፣ ዓሰፂኖ ዒዛ ኮይሉ ሙኮም ዓኤሌያኣና ዒዛ ዋይዘ ዒዒ ዓቲባኣዓዳ?» ጋዓንዳኔ።

18 ፓርሴና ማዶይና ካአቲም ዓጮይዳ ዓኣ ቢታንታ ዓኣ ዓሶኮ ላኣላ ይዳ ጌኤሻ ማዶ ቦርሲሳ ማዶ ዋይዘዎ ሃኖ ዓባ ጌሉዋንቲ ዓኒንሢ ዑፃ ያቸርሙም ዓርቃንዳኔ፤ ዓጮይዳ ዓጮይዳ ዓኣ ላኣላ ዓኒንሢ ቦንቾ ሃሻንዳኔ፤ ማይ ዓኒንሢና ላኣሎና ዋላ ዑራ ሌሊዋይ።

19 ካአቲዮ! ዓካሪ ኔኤኒ ዓኤዓያ ማዔቲ ጌኤሻ ዓሰፂኖ ሃካፓ ሴካ ኔ ቤርቶ ፔቲታዎ ሺኢኮዋጉዲ ላኣጋ ኪኢታ ከሴ፤ ይይ ፔቲታዎ ላኣሚንቲዋዎ ደዲ ናኣናና ዴዓንዳጉዲ ፓርሴና ማዶይና ካአቲም ዋጎይዳ ፃኣፒንታንዳጉዲ ዓይሢ፤ ዓሰፂኖኮ ካአቲም ማኣሮ ቦንቾ ዒዘፓ ዓኪ ማሌ ዒዘፓ ባሾ ማዔ ላኣሊም ዒንጌ።

20 ኔኤኒ ከሲ ዳኬ ዓይሢፃ ኔኤኒ ማርጌና ዴኤፒ ማዒ ዋይሢ ዓጮ ቢያይዳ ፔቲና ከኤዘንታዛ ፔቲ ፔቲ ላኣላ ፔኤኮ ዓኒ ያርጎቺ ማዔታቲያ ማንቆታቲያ ቦንቾ ናንጋንዳኔ።»

21 ካአቲንታ ዒዛኮ ደንዞ ማዔ ቢታንታ ዓኣ ዓሳ ቢያ ይኖ ጌኤዞ ዋዛና ዓኪኔ፤ ይዳ ማሙካኔ ከኤዜ ሃይሶ ካአቲ ዋይዚ ዓኪ ማዶይዳ ፔኤሽኔ።

22 ይዳሮ ካአቲ፡- «ፔቲ ፔቲ ማኣሮይዳ ዓኒ ማዒ ዓኣሢ ፔ ማኣሮይዳ ቢታንቶ ዓኣ ዓሲ ማዒ ጌሰታኒ ዴንዳዓያ ማዎም!» ጋዓ ዓይሢሢ ከሲ ዴማዲ ማሙካጮና፤ ሃሣ ሙኡጮ ፃኣፖ ዳምቦናኣ ጌኢጊሺንቲ ዒዛ ዓጮ ቢያ ሄላንዳጉዲ ዳኪኔ።

2

1 ደካ ዋርቁም ካኣቲኮ ደጋ ማዕሰካፓ፡ ጌኤሻ ዓሰደና ማዕ ዓከና ዒዞይዳ ከሰንጉት ዓይህያ ዎጎ ካኣቲ ማሊህህ ዓርቁኔ።

2 ዩያሮ ካኣቲኮ ደንዞ ማዒ ዒዞ ዘራ ዓሰ ሂዚ ጋዓ ማሊህህ ዒዞም ሺኢሸኔ፡- «ሚዛጲ፡ ኩሙህ ወዲሮ ናይ ኔኤም ኮይንጉቲቲ ቃራኬ፤

3 ኔኤኒ ካኣታዲ ዎይህ ዓጮ ጋሮይዳ ዓጮ ዓጮ ሱኡጌ ማዓ ዓሰ ደኣሪንጉቲም ሚዛጲ ወዲሮ ናይ ዔያታ ደኣሪ ዔከ ዔከ ኔኤኒ ካኣታቲ ዴዔ ካታሞ፡ ሱኡሳይዳ ኔኤም ጌዒ ዲማሲ ጌሦ ላኣላ ናንጋ ቤዞ ዔከ ሙኮንጎ፤ ዩያቶ ላኣሎ ቢታንቶና ዎይህንዳጉዲ ኔኤኒ ደኣሪ፡ ዓሸቲንቁ ማዳ፡ ህጋዬ ዛጊ ካፖንጎ፤ ዔያታ ኮሺ ሚዛጲንዳጉዲ ቶኣኮ ዔያቶኮ ዛጊ ዲማ ዲማ ባኣዚ ዔያቶም ማዳንቶንጎ።

4 ዔያቶ ባኣካፓ ዑህ ዓኣዴ ኔኤኒ ናሽካዞ ደኣሪጋፓ ዓሰደና ቤዛ ጌኤሾ ማህ» ጌዔኔ።

ዩይ ዘራ ኮሺ ማዕህህ ዛጊ፡ ካኣቲ ዔካፖ ዒማይዳ።

5 ዒማና ሱኡሳ ካታሞይዳ ናንጋያ፡ ሜርዴኪዮሴ ጌይንታ ዓይሁዳ ዓሰሰኬይ ዓኣኔ፤ ዒዚ ያዒሬ ናይ ማዕያ ቢኢኒያሜ ፃጶኮ ቁኢሴና ሸምዒና ዜርህኬ።

6 ባብሎኔ ካኣቲ፡ ናብካዳናፖኦሪ ዩሁዳ ካኣቲ ዒኮኒያኔንታ ሜሌ ዲቢ ዓሰንታ ዎላ ዩራሳላሚፓ ዲዒ ዔከ ዴንዴያና ዩያቶ ዓሰ ባኣካ ዒዚ፡ ዩይ ሜርዴኪዮሴ ዓኣኔ።

7 ዒዚ ዔብሬ ዓሰ ሙኡጮና ሃዳሳ ጌይንታያ ዒዛኮ ዓደ ጌኤዚ ናይ ዓሰቲሮ ጌይንታሰኬኖ ዜኤሪ ናይታንጉቲ ዲቻኔ፤ ዒዛኮ ማላህና ዔጶና ኮሺ ሚዛጲ ወዲሮ ናይኬ፤ ዒዞ ሾዔ ዓሰ ሃይቁማፓ ዓርቃፖ ሜርዴኪዮሴ ዒዞ ፔ ማኣራ ፔ ናይ ማህ ዛጊ ዲቹኔ።

8 ካኣቲ ወዲሮ ናኣቶ ኮዒፖ ኪኢቶ ዳካኣና ዔከ ሙኮና ወዲሮ ናኣቶ ባኣካፓ ፔቲዞ ዩኖ ዓሰቲሮኬ፤ ዒዞ ዒማና ካኣቲም ማኣሪ ዔውቲ ዴንዲ ሚዛጲ ላኣሎ ዲማሲ ናንጊሾ ቤዞይዳ ዓኣ ላኣሎኮ ሱኡጌ ማዒ ዎይህ፡ ህጋዬ ዛጊ ዒዞ ቆላንዳጉዲ ዒንጊንጉቲኔ።

9 ዓሰቲራ ህጋዬ ኮሺ ዎዛሳያ ማዕኔ፤ ዒዞ ቤርታ ዒዞ ቦንቹንታ ዓሰ ማዒ ጴዳኔ፤ ዩያሮ ዒዚ ኔጉዎፖ ቃራ ሙኡዚ ዒዞም ዒንጊንታንዳጉዲ፡ ሃህ ዒዞኮ ዑፃ ዲማ ዲማ ቲሽኮ ባኣዚና ቲሽኪንጉ ጊኢጊም ሚዛጲ ማዒ ዒዞ ዴዓንዳጉዲ ዓይህኔ፤ ካኣቲም ደኣሪ ጌሦና ላኣላ ናንጋ ማኣሮፓ ዑህ ዓኣዴ ቃራ ማኣሪ ደኣሪ ዒንጊ ካኣቲም ማኣሮይዳ ማደም ዲማሲ ከሶና ላኣሎፓ ላንካይ ላኣሊ ዒዞም ማዳንዳጉዲ ደኣሪ ዒንጌኔ።

2:6 2ካኣቶ. ማ 24:10-16፤ 2ፖኦሲ. ዓሃኬ 36:10።

10 ሜርዴኪዮሴ ቤርታ ዓስተሮም ኬኤዚ ሃሾሢሮ ዒዛ ዓይሁዳ ዓሲ ማዒያ ዓሲም ኬኤዙዋዎ ዓኣቶ ዓርቁኔ፤

11 ዓስተራ ዋዚ ዓኣቲያ፣ ዒዛም ዓይጌ ማዲንታንዳቲያ ዋይዚ ዔራሲ ቢያ ኬሊ ዶኦሪንቴ ላኣላ ናንጋ ኬኤፆኮ ጳኦኮና ሴካ ሃንጋ ሜርዴኪዮሴ ሃንታኔ።

12 ዬና ዶኦሪ ጌሃ ላኣላ ካኣቲ ኮራ ሺኢካንዳሢኮ ቤርታ ቃራ ባኣዚ ዔያቶም ማዲንቲ ማዲንቲ ፔቲ ለዔ ጉቤ ዴዓኔ፤ ዬይ ያዲ ማዲንታሢ ዑፃ ዔያቶኮ ሚዛጲ ገኢጋንዳጉዲኬ፤ ዬያሮ ቤርታሳ ላሆ ዓገሮ ኬርቤና ዛይቲ ጌይንታ ቲሺና ቲሽኮኔ፤ ሃሃ ዓቲ ላሆ ዓገሮ ባልሳሜ ጌይንታ ቃራ ቲሺና ዔያቶ ቲሽኮኔ፤ ዬካፓ ፔቲ ፔቲ ወዲራሢ ኬሊና ኬሊና ካኣቲ ዓርፄክሲሴ ኮይሎ ዔኪ ጌልዞኔ።

13 ዶኦሪንቴ ላኣላ ናንጋ ማኣሮይዳፓ ኬሰኪ ካኣቲ ኮይላ ዴንዳኣና ዒዛ ማኣዓሲ ኮዔ ማኣዓ ዒንገንታኔ።

14 ዬካፓ ዒዛ ዒባሮ ካኣቲና ዋላ ዋርቃዛ ዚሮ ጉቲ ገንሣ ዔኪ ሙኪ ዶኦሪንቴ ላኣላ ናንጋ ኬኤፃፓ ፔቲ ኬኤሢ ጌልዞኔ፤ ዒኢካ ዬያ ካኣቲ ላኣሎኮ ሱኡጌ ማዒ ዋይሣ፣ ዓሽቲማሢ፣ ሻዕሺጋዜ ዔያቶ ዛጋያ ማዒም ዴዓኔ፤ ካኣቲ ዬያ ላኣሎ ናሽኪ፣ ሱንፆ ዔኤሊ ዔኪ ሙኪባኣ ላኣሊ ላሚ ካኣቲ ኮይላ ሙኩዋሴ።

15 ዬያይዶ ጎይያና ዓስተራ ካኣቲ ኮራ ጌላ ኬላ ሄሌኔ፤ ዬና ዓስተራ ዓቢሃይሌ ናይ፣ ሃሃ ዒዛ ፔ ናይ ማሂ ዲቻ ሜርዴኪዮሴኮ ዓዶ ጌኤዚ ናይ ማዔያኬ፤ ዒዛ ዛጋ ዓሶ ቤርታ ቢያ ቦንቺንታ ዓሲ ማዒ ጴዳያኬ። ዒዛ ካኣቲ ኮይላ ጌላኒ ኬላ ሄላዛ ዒዛ ማኣዔሢ ዶኦሪንቴ ሚዛጲ ላኣሎ ሱኡጋሢ፣ ዓሽቲንቁ ማዳ፣ ሄጋዬ ማኣዓንዳጉዲ ዞሬ ማኣዓሢኬ፤ ዒዛ ያኦጩ ማኣያቱዋሴ።

16 ካኣቲ ዓርፄክሲሴ ካኣታዳንቴ ላንካሳ ሌፆኮ ቴቤቴ ጌይንታ ታዞጸሳ ዓገሮና ዓስተሮ ካኣቲ ኮይላ ዓሳ ዔኪ ጌልዞኔ።

17 ካኣቲ ዒማና ሃንጎ ወዲራሢዳፓ ቢያ ዒዛ ባሺ ናሽኬኔ፤ ዒዛ ሃንጎዋቶይዳፓ ቢያ ባሺ ካኣቲ ቤርታ ቦንቺንታያ ማዒ ጴዳኔ፤ ዬያሮ ካኣቲ ዒዛኮ ቶኦካ ካኣቱም ማኣራ ቦንቺ ዓጎ ባኮ ዔኪ ዓጋፆ ዓሰፂኖ ቤዛ ዒዛ ጌኤሾ ማሄኔ።

18 ዬካፓ ካኣቲ ዓስተሮ ቦንቺ ዴኤፒ ሙኡዚና ዑሺና ገኢገሺሳፆ ዒዛኮ ዶንዞ ማዔ ቢታንታ ዓኣ ዓሶና ዲማ ዲማ ፓቆና ዓጮ ዋይሣ ዓሶና ቢያ ዔኤሌኔ፤ ዒዚ ካኣታዲ ዋይሣ ዓጮ ጋራ ዓኣ ዓጮ ቢያይዳ ዋዛ ቦንቻ ዓሳ ቦንቻንዳጉዲ ኪኢታ ዳኬኔ፤ ዒዚ ፔኤኮ ዓኣ ባካፓ ኮሹዋና ዒንጎ ዒንገሢያ ዓሶም ዒንጌኔ።

ሜርዴኪዮሴ ካኣቲ ሹምፖ ዓውሴሢ

19 ኩሙዎ ዉዲሮ ናኣቶ ካኣቲ ማኣሪ ላምዓሶ ዔኤሊ ቡኩሶዋኣና ማርዴኪዮሴ ካኣቲ ማኣሮ ካሮ ጳኦኮይዳ ፔቴ ሱኡጋቶ ማዶ ዒገገንጌትም ዶኦሪንጌት ዴዒ ዓኣኔ።

20 ዓስተራ ዬያ ሄለንዳኣና ዒዛ ዓይሁዴ ዓሲታሢ ኬኤዙዋዎ ዓኣቲ ዓኣኔ፤ ማርዴኪዮሴ ዒዛም ዬያ ዒዛ ዓሲም ኬኤዙዋጉዲ ላቲናኣኮኬ፤ ዒዛ ናይ ዓኣዎ ዒዛ ማኣራ ዲጫኣና ቢያ ባኣዚና ዓይሢንጎታሢጉዲ ዒማናኣ ዒዛም ዓይሢንጌ።

21 ማርዴኪዮሴ ካኣቲም ማኣሮ ካራ ዴዒ ዓኣንጌ ካኣቲ ዎርቃ ኬኤዎ ጌሎ ካሮ ካፓ፡ ቢግታኔንጎታ ቴሬሼ ጌይንጎ ላምዎ ዓሲሰከንሢሢ ካኣቲም ማኣራ ዓሽቲንቂ ማዶ ማዳያታዎ ካኣቲ ዓርፄክሲሴ ዒዲ ዎዳኒ ዎላ ዘርጌ።

22 ማርዴኪዮሴ ዬያ ጌኖ ማሊዎ ዔራዎ ጌኤሾ ዓስተሮም ኬኤዘኔ፤ ዒማና ዓስተራ ዬያ ሃይሶ ማርዴኪዮሴፓ ዎይዜሢ ፔጋሲ ካኣቲም ኬኤዘኔ።

23 ዬካፓ ዬያ ሃይሶኮ ጎኩማ ዘገንጎታ ዬይ ባካ ጎኔ ማዒ ጴዳኔ፤ ዬያሮ ዬያታ ላምዎ ፑርቶ ዓሳ ሱዲንጌት ሃይቃንዳጉዲ ዎገንጌትም ዎዳንጌ፤ ዬይ ባካ ካኣቲ ዘሎ ሃይሶ ፃኣፒ ጌሦ ቤዛ ፃኣፒንጌት ዴዓንዳጉዲ ካኣቲ ዓይሢ።

3

ሃማ ዓይሁዴ ዓሶ ባይዛኒ ማሌ ጌኖ ማሊዎ

1 ዬካፓ ካኣቲ ዓርፄክሲሴ ሃማዳታ ናኣዚ ዓጋጌ ዓሲ * ማዔሢ፡ ሃማ ሃንጎ ቢታንጎ ዓኣ ዓሶይዳፓ ቢያ ዑሣ ቢያሢ ዓይሢያ ማሃ ዶኦሬ።

2 ካኣቲ ፔ ዓጮይዳ ቢታንጎ ዓኣ ዓሳ ቢያ ጉምዓቲ ሃማም ዘገገ ቦንቾ ዔኤሊሢ ዔኤሊንዳጉዲ ዓይሢ፤ ዬያሮ ቢታንጎ ዓኣ ዓሳ ቢያ ዓይሢንጌት ጎይዎ ማዳኔ፤ ዬያይዳኒ ማርዴኪዮሴ ሌሊ ዒፄ።

3 ካኣቲም ማኣራ ማዳ ቢታንቶና ዓኣ ዓሳ ማርዴኪዮሴ ኮይላ፡- «ካኣቲ ዓይሢ ዓይሢያ ኔኤኒ ዓይጎሮ ዒፃይ?» ጌዒ ጌዒ፡

4 ቢያ ኬሊ ዒዚ ፔ ማሊዎ ላኣማንዳጉዲ ዒዛ ዘራኔ፤ ዒዚ ጋዓንጌት ዔያቶም ዎይዘ ዒፄ፤ ዬያ ሌሊቱዎንጌት ዒዚ፡- «ታኣኒ ዓይሁዴ ዓሲ ማዔሢሮ ሃማም ታ ዚጋንዳያ ኮይሱዎሴ» ጌዒ ጋፒ

* 3:1 ዓጋጌ ዓሲ፡- ዬይ ዓጋጌ ጎዎሢ ዓማሌቄ ዓሶ ካኣቲኬ፤ ዬያ ዓሢ ፃጳ ሚናንካፓ ዒሲራዔኤሊ ዓሶና ዎላ ሞርኬ ማዒ ናንጋያኬ፤ ያኦሲ ማሊዎ ኬኤዛ ሳሙዔኤሊ ዬያ ካኣታሢ ዎዳያ ማዔሢሮ ሞርኮ ማዒ ዘርሢ ዘላና ማዓንዳኣፓዓቴም ማርዴኪዮሴ ዒዲ ሌሊ ማዶናያቱዎሴ (1ሳሙ. 15:33።)

ከኤዜሢያር ዬና ዘራ ዓሳ፡- «ሜርዴኪዮሴኮ ሃያ የቶርሙዋ ዋዲ ዛጊ ገብንደይ?» ጌይ ሃይሶ ጳጳረሱ ሃማሞ ከኤዜኔ።

5 ሜርዴኪዮሴ ዒዛሞ ጉምዓቲ ዘገባኣሢ ሃማ ዋይዛያ ዒናፓ ዲጋዳኔ።

6 ሃሣ ሜርዴኪዮሴ ዓይሁዳ ዓሲ ማዕሢያ ዔሪ «ዋዋዳንዳኔ» ጌይ ማላያ ሜርዴኪዮሴ ሌሊ ዋዲፃ ዔኤቢ ማይንዲዋኣሢ ማሊ ዔኤኔ፤ ዬያር ጉቤና ፓርሴ ካኣቱሞ ዓጮይዳ ዓኣ ሜርዴኪዮሴ ዒጊኖ፡ ዓይሁዳ ዓሶ ቢያ ዋድንደ ካራ ኮዔኔ።

7 ዓርፃክሲሴ ካኣታዳንቲ ታጳ ላምዓሳ ሌዖኮ ኒሳኔ ጌይንታ ቤርታሳ ዓጊኖና «ፑሪሜ» ጎዖያ ዲማሲ ዔራኒ ዓጎ ባካ ዓጊንቶ ዓርቃንዳጉዲ፤ ሃሣ ዓይሁዳ ዓሶ ባይዛኒ ማሎና ማሊፃ ከንሣንደሢ ዋማ ዓጊኖና ከሎና ገኢጋንዳቲያ ዓሳ ዒፃ ዓጋንዳጉዲ ሃማ ዓይሣኔ፤ ዬና ዒፃላ ዓዳሪ ጌይንታ ታጳ ላምዓሳ ዓጊኖኮ ታጳ ሃይሣሳ ከሎና ማዓሢ ዔርዜም ዒማና ማዓንዳጉዲ ጌሰቲ ዔቁሲንቲኔ።

8 ዬያር ሃማ ካኣቲ ዓርፃክሲሴም፡- «ኔኤኒ ካኣታዲ ዋይሣ ዓጮይዳ ዲማ ዲማ ዓጫ ዜርቁንቲ ናንጋ ፑቲ ፃጲ ዳሪ ዓኣኔ፤ ዬና ዳርኮ ሜሌ ዓሶፓ ዲማ ዋጌ ዓኣያኮኔ፤ ዬና ሌሊቱዋንቲ ኔና ካኣታሢኮ ዋጎም ዔያታ ዓይሢንቲዋያ ማዔኔ፤ ዬያር ዬያጉዳ ዳር ዘቲ ጌይ ኔኤኒ ዛጌቲ ኔኤም ፑርታንዳኔ፡ ገኢጋዓኮ፤

9 ካኣቲዮ! ኔኤኒ ዔኤዓቲ ዬና ዳራ ሃይቃንዳጉዲ ዋጊሳንዳ ዓይሥሢ ከኢታ ከሰኮንጎ፤ ኔኤኒ ዬያይዳቲ ታኣኒ ኔ ካኣታዲ ዋይሣ ዓጮይዳ ማዳንታ ባኮ ማዲሻንዳ ሃይሣ ፃኤታና ያይዲታሚ ሺያ ከሎ ማዓ ሹቺ ቢራ ገኢሪሺ ጌልዛኒ ጫኣቃኔ» ጌዔኔ።

10 ዬያር ካኣቲ ዒዚ ዓይሢያ ከሴያ ማዒያ ዔርዛ ዒዛኮ ከኤሎ ዠራሢ ማላታ ማዒ ከሶና ዓይሢያይዳ ጳርቁንታንዳጉዲ ዓጋጌ ዓሢ፡ ሃሜዳታ ናኣዜ፡ ዓይሁዳ ሞርካሢ፡ ሃማሞ ዒንጌኔ።

11 ካኣቲ ዒማና፡- «ሚኢሻ ታ ኮዑዋሴ፤ ጋዓንቲ ዳር ናሽኬ ባኣዚ ማማዳ» ጌይ ዓይሣኔ።

12 ዬያር ቤርታሳ ዓጊኖኮ ታጳ ሃይሣሳ ከሎና ካኣቲኮ ፃኣፓ ባኮ ፃኣፓ ዓሶ ሃማ ዔኤሊ ዔኪ ሙኮኔ፤ ዬካፓ ዬያታ ዓሳ ሃማኮ ዓይሢያ ቢያ ዲማ ዲማ ፓቁንቲ ዓጮይዳ ፃኣፓ ፒዳሎና ዲማ ዲማ ዳር ሙኡጮና ዓጮ ዋይሣ ዋይሣ ዓሶም፤ ሃሣ ቢታንታ ዓኣ ሱኡጎም ሱኡጎም ፃኣፒኔ። ዬይ ፃኣፒንቲ ዓይሢያ ካኣቲ ዓርፃክሲሴ ሱንዮና ፃኣፒንቲ ዒዛኮ ዠራሢ ማላታ ማሢ ገዳ ጳርቁንቲም ዳኪንቲኔ።

13 ዬያ ፃኣፒንቴ ኪኢቶ ጳሺ ሩኡሪና ጳሽካ ዓሳ ካኣቲ ዎይህ ዓጮ ጉቤህ ሄሊሳንዳጉዲ ዓይሂንቴም ዔኪ ዳንዴኔ፤ ዬሮ ዓይሂያ ኪኢቲሎይዳ፡- «ዳሬ ጌይንታ ታጾ ለምዓሳ ዓገሮኮ ታጾ ሃይህሳ ኬሎና ዓይሁዳ ዓሲ ጌይንታያ ቢያ፤ ዴጌ፡ ጋርቹ፡ ላኣሊንታ ናይንታ ዓይሱዋዎ ዎዲ ጋፒሲ ባይዙዋቲ!» ጋዓያ ዓኣኔ፤ ሃሣ፡- «ዔያቶኮ ዓኣ ባካኣ ቢያ ቡሪንቶንጎ!» ጋዓ ዓይሥሂያ ዓኣኔ።

14 ዬና ጌይንቴ ኬሌላ ሄላዛ ዓሲ ቢያ ጊኢጊንቴ ካፓኒ ፃኣፒ ዳኮና ኪኢቶ ዛጎም ጳኣኮይዳ ጌሂንታንዳጉዲ ካኣቲ ዎይህ ዓጮ ቢያ ዓይህኔ።

15 ካኣቲ ዓይህም ዬና ኪኢቲላ ካኣቲ ካኣታዲ ዴዒ ዓኣ ካታም ሱኡሳይዳ ዓሲ ቢያ ዛጋንዳጉዲ ጌሂንቴኔ፤ ጳኦ ጳሽካ ሩኡሮ ዓሳኣ ካኣቲ ዓጮ ቢያ ዬያ ኪኢቶ ሄሊሴኔ፤ ዬያሮ ካኣቲ ካኣታዲ ዓኣ ሱኡሳ ካታማ ጎይሂ ባይዚ ዓኣንቴ ካኣቲና ሃማና ፔቴ ቤሰካ ዴዒ ዎይኔ ዑሺ ዑሽካኔ።

4

ዓሰተራ ዔያቶ ማኣዳንዳጉዲ ማርዴኪዮሴ ዖኦጮህ

1 ማርዴኪዮሴ ዬያ ማዲንቴ ባኮ ቢያ ዎይዛዎ ዖዩ ፔኤኮ ማኣዓሂ ዳርዘኔ፤ ዬካፓ ሲዬ ፓቲሌ ማይንቴ ቶኦካ ፔኤኮ ዲቢንሂ ዎሂ ዑኡዞ ዴጊዲ ዒላቲ፡ ዒናፓ ዬኤኪ ዬኤኪ ካታም ጌሌኔ።

2 ዓይጎ ዓሲያኣ ማዎም ሲዬ ፓቲሌ ማኣዒ ካኣቱም ማኣሪ ጌሉዋጉዲ ላኣጋ ዎጌ ዓኣሂሮ ካኣቱም ማኣሮኮ ካሮ ሙኪ ሄላዎ ጋሮ ጌላኒ ዒ ዳንዳዒባኣሴ።

3 ካኣቲኮ ዓይሂያ ኪኢታ ሄሌ ዓጮ ቢያሂዳ ዓኣ ዓይሁደ ዓሳ ዴኤፒ ዖዩሂ ዖዩኔ፤ ዔያታ ሙኡዚ ሙውዋዎ ሃሺ፡ ዑኡዞዋ ፔኤኮ ዴጊዲ ዬኤፒ ዓርቄኔ፤ ባሼ ዓሳ ሲዬ ፓቲሌ ማኣዒ፡ ቶኦካ ፔኤኮ ዲቢንሂ ዎሂ ዴዓኔ።

4 ዓሰተሮም ማዲ ላኣሎንታ ዒዞ ካፓ ዓሽቲም ዓቲንቃኣ ማርዴኪዮሴ ዬያ ማዲ ባኮ ቢያ ሙኪ ዓሰተሮም ኬኤዛዛ፡ ዓሰተራ ዒናፓ ዖዩኔ፤ ማርዴኪዮሴ ሲዮ ፓቲሎ ማይንቴህ ሃሺ ማሌ ማኣዎ ማይንታንዳጉዲ ማኣዎ ዒዞ ዳኪኔ፤ ዒዚ ጋዓንቴ ዬያ ዒፃኔ።

5 ዬካፓ ዒዞ ካኣቱም ማኣራ ዓሽቲንቄ ማዲ ዓሳ ባኣካፓ ዒዞም ሌሊ ባሼ ማዲንዳጉዲ ካኣቲ ዓይህ፡ ሃታኬ ጎዎሂ ዔኤሊ ዔኪ ሙካዎ ማርዴኪዮሴ ኮይላ ዎዎይቲቲያ ዖኦጮም ዳኪኔ።

6 ሃታኬ ዒ ማና ካኣቱም ማኣራ ጌሎ ካሮ ኮይላ ዓኣ ዴራ ቡካ ቤዞ ማርዴኪዮሴ ባንሂ ሙኪኔ።

7 ይያር ሜርዴኪዮሴ ዒዛይዳ ማዲንቴ ባኮ ቢያ ፓይዲ ፓይዲ ኬኤዜኔ፤ ሃማ ዓይሁዶ ዓሳ ቢያ ዒዛም ሃይቃያ ማዕቲ ካኦቱም ማኣሮኮ ማሆ ጌሃ ኬኤዎ ምማጉዳ ሚኢሹ ዔኪ ጌልዛንዳቴያ ካኦቱም ጫኣቄሢያ ጊዳ ኬኤዜኔ።

8 ዓይሁዶ ዓሳ ኩርሳኒ ሱኡሳ ካታሞይዳ ፃኣፒንጉ ጌሃናሢፓ ዔኪ ፃኣፖናያ ሃታኬም ዒዚ ዒንጌኔ፤ ዬይ ካኦቲ ኬሴ ዓይሢዎ ኪኢታፓ ዔኪ ፃኣፖናሢ ዓስተሮም ዒዚ ዒንጋንዳጉዲና ማዲንጉ ባኮ ቢያ ዒዛም ኬኤዛንዳጉዲ፤ ዬያጉዲ ሃሃ ዒዛ ካኦቲ ኮይላ ጌላ ዒዛኮ ዳሮ ካኦቲ ማኣራንዳጉዲ ሺኢቆም ጌይ ኬኤዛንዳጉዲ ሃዳርሴኔ።

9 ሜርዴኪዮሴ ጌዔ ባኮ ቢያ ሃታኬ ማዲ ኩንሣኔ፤

10 ዓስተራ ጊንሣ ሃሃ ሜርዴኪዮሴም ሃታኬ ዑፃ፡-

11 «ኔኤኒ ዔራሢጉዳያ ዓቲንቄያ ማፖም ላኣሊ፣ ዓይጎ ዓሲያ ዔኤለንቱዎን ካኦቱም ማኣሮኮ ሳዛ ዓኣ ዳራ ቡካ ቤዞ ጌላኒና ካኦቲ ዛጋኒ ማሌቴ ምዎዶኔ፤ ምጋ ያኣዳ ማዔሢ ካኦቲ ዞራ ዓሶፓ ዓርቃፖ ዳንዲ ዳሮ ሄላንዳኣና ያኣኒያ ዬያ ዔራያኬ፤ ምጎ ጎይያና ሃይቁዎፖ ዓታንዳሢ ዓይጎ ዓሲያ ማፖም ዒኢካ ጌልዛ ካኦቲ ፔኤኮ ምርቆ ኮኣሎ ባንሢ ሎይሴ ዓሶማ ሌሊኬ፤ ታኣኒ ካኦቲ ኮይላ ጌላኒ ዔኤለንቲንጉ ሃይሢታሚ ኬሊፓ ዑሣ ዓኣዳኔ» ጌይ ኪኢታ ማሃ ዳኬኔ።

12 ሜርዴኪዮሴ ዓስተሮ ኪኢቶ ዔኬሰካፓ፡

13 ጊንሣ፡- «ኔኤኒ ካኦቱም ማኣሮይዳ ናንጋኒ ዳንዳዒያና ሜሌ ዓይሁዶ ዓሳ ጋፔም ኔኤኒ ቶሊ ዓታንዳያ ኔኤም ማሎፓ፤

14 ሃያጉዳ ባኣዚ ሙካኣና ቦሂ ኔኤኒ ዚቲ ጌዔቴ ዓይሁዶ ዓሶም ሜሌ ቤሰካፓ ማኣዳ ሙኪ ዓታዓኬ፤ ዔያታ ዳቃንዳሢ ዔርቴያኬ፤ ጋዓንጉ ኔኤኒ ሃይቃንዳኔ፤ ኔ ዓዶ ማኣሮኮ ሱንፃ ባይቃንዳኔ፤ ጎፖንጉ ሂንዳ ማሌ፣ ኔኤኒ ጌኤሾ ማዔሢ ሃያ ማቶይዳ ኦኡኒ ጌላኣና ኦና ማኣዶም ማዶናቴያ ፖ ዔራይ?» ጋዓ ላቲሢ ኪኢታ ዳኬኔ።

15 ዒማና ዓስተራ ሜርዴኪዮሴም፡-

16 «ዳንዲ ሱኡሳይዳ ዓኣ ዓይሁዶ ዓሶ ፔቴይዳ ቡኩሴ፤ ምላም ኬኤዚጋፓ ሙኡዚ ሃሻፖ ታኣም ሺኢቁጠቴ፤ ዳንዲ ሃይሃ ሮኦሪና ምንቴና ማዓንዳኣና ዓይጎ ሙኡዚያ ሙይፖቴ፣ ዓይጎ ዑሺያ ዑሽኪፖቴ፤ ታናንታ ታኣም ማዲ ላኣሎንታ ኦሞ ዒማይዳንዳኔ፤ ዬካፓ ዓካሪ ምጋ ዓይሁዎያ ማዔቴያ ጫርቄ ካኦቲ ኮይላ ታ ጌላንዳኔ፤ ታ ዬያይዲያና ሃይቄቴያ ሃይቄንቶንጎ!» ጌይ ኪኢቲኔ።

17 ይያር ሜርዴኪዮሴ ዳንዲ ዓስተራ ጌዔ ባኮ ቢያ ማዴኔ።

5

ዓስተራ ካኣተንታ ሃማንታ ሙኡዚር ዔኤሌህ

1 ዓስተራ ሙያ ሃሽማፓ ሃይህሳ ኬሎና ካኣቶ ማኣር ማኣዓህ ማይንቲ ካኣቱሞ ያይታ ዓኣ ኬኤያኮ ቤርቶ ዛላ፣ ካኣቱሞ ማኣር ሳዛ፣ ዓሳ ቡካ ቤዛ ጌሊ ዔቄኔ፤ ዒማና ካኣቲ ዬኖ ኬኤያ ጌሎ ካርና ፒዜ ጊኢጊሺ ጌሆና ካኣቱሞ ያይታ ዴዒ ዓኣኔ።

2 ዓስተራ ዬኖ ኬኤያኮ ዙላ ሙኪ ዔቄህ ካኣቲ ዴንቃያ ዒዛ ቦንቹንታ ዓሲ ማዒ ዒዛሞ ጴዴህረ ሞርቆ ኮኣሎ ዒዛ ባንህ ሎይሴኔ፤ ዬያር ዒዛ ባንህ ዶጨ ሞርቆ ኮኣሎኮ ቤርቶ ካኣሜኔ።

3 ካኣቲ ዒዛ ኮይላ፡- «ዓስተራ፣ ኔ ዓይጋ ሙኬይ? ኔ ኮዓ ባኮ ታኣሞ ኬኤዜ፤ ታ ካኣታዲ ዎይህ ዓጮኮ ሄካህታቲያ ታ ኔኤሞ ዒንጋንዳኔ» ጌዔኔ።

4 ዓስተራ፡- «ካኣቲዮ! ኔኤኒ ዔኤዓያታቲ ሃኖ ዒባኒ ታኣኒ ጊኢጊሻንዳ ካሞህ ሙዒኒ ኔናንታ ሃማንታ ሙኬቲ ታኣሞ ቃራኬ» ጌዔኔ።

5 ዬካፓ ካኣቲ ዑካዲ ሃማ ዔኤሊሳያ ዓስተራ ጊኢጊሺ ካሞህር ዴንዳኒ ዔያቶ ኮይሳህ ኬኤዜኔ፤ ዬያር ካኣቲና ሃማና ዓስተራ ጊኢጊሺ ሙያ ቤዞ ዴንዴኔ።

6 ዒኣካ ዔያታ ዎይኖ ዑዡ ዑሽኪቤቃ ካኣቲ ዓስተሮ ኮራ፡- «ዓይጎ ባኣዚያ ማምም ኔ ኮዔ ባኣዚ ታና ያኣጩ፣ ታ ኩንህንዳኔ፤ ታ ካኣታዲ ዎይህ ዓጮኮ ሄካህያ ማምም ኔ ያኣጩቲ ታ ዒንጋንዳህ ዔርቲያኬ!» ጌዔኔ።

7-8 ዓስተራ ዒዛሞ ማሃያ፡- «ኔና ቦንቹንቲ ካኣታህ ቤርታ ታኣኒ ቦንቹንታ ዓሲ ማዔም ያኣጩ ባኣዚ ቢያ ኔ ኩንህኒ ዴንዳዓያ ማዔቲ ዚር ጊንህ ታኣኒ ጊኢጊሻንዳ ካሞህዳ ኔናንታ ሃማንታ ሙካንዳጉዲ ታ ዒንህ ቦንቹ ሸኢቃኔ፤ ዒማና ታኣኒ ኮዓ ባካ ዓይጎታቲያ ፔጋሲ ኔኤሞ ኬኤዛንዳኔ» ጌዔኔ።

ሃማ ሜርዴኪዮሴ ዎዳኒ ማሊ ጊኢጊንቲህ

9 ሃማ ዬያ ሙያና ዑዡናፓ ኬሰኪ ዴንዳኣና ዒናፓ ዎዛዲ ዎዛዲ ዴንዴኔ፤ ጋዓንቲ ዒዚ ካኣቱሞ ማኣር ጌሎ ካር ኮይላ ሜርዴኪዮሴ ዴይ ዓኣንቲ ዴንቄኔ፤ ዒዚ ዒኣና ዴንዳኣና ዴዔ ቤዛፓ ዔቄ ሜርዴኪዮሴ ዒዛ ቦንቹባኣህ ዛጋያ ዒናፓ ዳጋዴኔ፤

10 ጋዓንቲ ዒዚ ዬያ ዳጎ ሜታዲ ገቢ ፔ ማኣሪ ዴንዲ ሄሌኔ፤ ዬካፓ ዒዛኮ ላጎ ዒዛ ማኣሪ ሙኮሞ ዔኤሊሳያ ዒዛኮ ማቻ፣ ዜሬሻ ዔያቶና ዎላ ዴዓንዳጉዲ ዓይህኔ።

11 ዲዚ ዲማና ዲዛኮ ጾርጎቹሞንታ ናኣቶንታኮ ዲቡሞ፤ ሃሃ ካኣቲ ዲዛሞ ቢታንቶ ደጊዲ ዲንጌ ጎይዖንታ፥ ሜሌ ቢታንታ ዓኣ ዓሶፓ ዲ ባሽ ማዒያ ጾቶርሙሞና ሃርሺ ሃርሺ ዬያ ዓሶሞ ኬኤዜኔ፤

12 ሃሃ ዲ ቃሲ ኬኤዛዖ፡- «ዬያ ሌሊቱሞንቱ ጌኤሻ፥ ዓስተራ ጊኢጊሽ ሙዖይዳ ካኣቲና ታኣና ሌሊ ዲዛ ዔኤሌኔ፤ ሜሌ ዓይጎ ዓሲያኣ ዔኤሊባኣሴ፤ ዚሮ ጊንሣ ሃሃ ዲዛ ሙኡዚ ሙዖሞ ኑና ዔኤሌኔ፤

13 ጋዓንቱ ዬይ ዓይሁዶ ዓሢ፥ ሜርዴኪዮሴ ካኣቱሞ ማኣሮ ጌሎ ካሮ ኮራ ዴዒ ዓኣንቱ ታ ዛጋዛ ሃይ ታኣኮ ቦንቾና ዴኤፑሞና ዔኤቢ ታኣሞ ማሎ ዲዪኔ» ጌዔኔ።

14 ዬያሮ ማቾንታ ዲዛኮ ላጎንታ ቢያ፡- «ጾሱማ ዶንጊታሚ ዋዳ ማዔ፥ ዓሲ ሱሎንዶ ሚሢ ጊኢጊሽጋፓ ዚሮ ጉቱ ሜርዴኪዮሴ ሱፃኒ ካኣቲ ጾኣጫኒ ኔ ዶንዳዓኔ፤ ዬካፓ ዓካሪ ዋዛና ሙዖ ቤዞ ዓኣዴቲራ» ጋዓ ማሊሢ ሸኢሽኔ። ዬይ ዞራ ሃማሞ ኮሺ ማዔሢ ዲዚ ዛጊ ዔከ ሱዖንዶ ሚያ ጊኢጊሽኔ።

6

ካኣቲ ዓርፃክሲሴ ሜርዴኪዮሴ ሱኡጌ ማሃ ዶኔሬሢ

1 ዬዶ ዋንቱሎ ካኣቲኮ ማሊሢታዖ ጊንዖ ባይዜሢሮ ካኣቱሞ ማኣራ ፃኣፒ ፃኣፒ ጌሦና ሃይሶ ዓሳ ዲዛሞ ናባባንዳጉዲ ዓሶ ዲዚ ዓይሢኔ።

2 ናባባንቱ ሃይሶ ባኣካ ካኣቲ ናንጋ ኬኤዖ ካፓ፥ ቢግታኔና ቲሬሽ ጌይንታ ዓሸቲንቂ ካኣቲ ማኣራ ማዳ ላሞዖ ዓሶንሢ ካኣቲ ዋዳኒ ማሌ ጌና ማሊያ ሜርዴኪዮሴ ዔሪ ኬኤዚ ቶሊሴ ሃይሴ ጶዴኔ።

3 ዬያሮ ካኣቲ፡- «ሂዳዖ ሜርዴኪዮሴ ዬያ ማዴሢሮ ኑ ዲዛሞ ዓይጎ ቦንቾ ዲንጊ ዴኤፒሴይ?» ጌይ ጾኣጩኔ።

ዲዛሞ ማዳ ዓሳ፡- «ዲዛሞ ማዴንቱ ባኣዚ ፔቲታዖ ባኣሴ» ጌዔኔ።

4 ካኣቲ ጊንሣ፡- «ካኣቱሞ ማኣሮይዳ ታኣኒ ዲንጌ ቢታንቶና ዓኣ ዓሶፓ ሃካ ዓሲ ዓኣ?» ጌይ ጾኣጩኔ።

ሃማ ዲማና ዲኢኒ ጊኢጊሽ፥ ሱዖ ሚዖይዳ ሜርዴኪዮሴ ሱፃኒ ካኣቲ ጾኣጩሮ ካኣቱሞ ማኣሮይዳ ዓሳ ቡካ ቤዞ ጌሎ ጌላኔ፤

5 ዬያሮ ካኣቲሞ ማዳ ዓሳ፡- «ሃይሾ ሃማ ኔና ዔኤቢ ጾኣጩኒ ኮዓኔ» ጌዔኔ።

6:2 ዓስተ. 2:21-22።

ካአቲ ዔያቶም፡- «ሃኒ ጌሌ፣ ጎውዋቱ» ጌዔኔ።

6 ሃማ ካአቲ ኮይላ ጋር ጌላዛ፣ ካአቲ ዒዛ ኮራ፡- «ታኣኒ ዴኤፒሲ ቦንቸሳኒ ኮዔ ፔቱ ዓሲ ዓኣኔ፤ ዩያ ዓሢም ታ ዓይጎ ማዴቱ ቃራዲይ?» ጌይ ያኦጩኔ።

ሃማ፡- «ካአቲ ታና ቦንቸሳንዳሰካይ! ሜሌ ዓይጎ ዓሲ ዓኣ?» ጌይ ፔ ዒኖና ማሌኔ።

7-8 ዩያር ካአቲም፡- «ዩያጉዴ ዓሢም ካአቲም ማኣያ ኔኤኒ ማኣዔዘንሢ ዔኪ ዩዓንዳጉዲ ዓይሢ፤ ኔኤኒ ቶጌ ፓራሢኮ ቶኣካ ካአቲም ቦንቸም ዓጎ ማላቶ ዓሶ ዓገሲሴ፤

9 ዴኤፖ ሱኡጋፓ ፔቱ ዓሲ ዔኤሊሲ ዔኪ ሙኡሴ፤ ዩይ ዓሢ ካአቲም ማኣዓሢ ዒዛ ማይሲ፣ ገኢገሸና ፓራሢያ ቶገሲ ዒዘኮ ቤርታ ቤርታ ካታምይዳ ዓሳ ቡካ ጸኣኮ ኬሰኮንጎ፤ ላምዓሢ ዎላ ዴንዳኣና ዩይ ፓራሢኮ ቤርታ ዓኣዳ ሱኡጋሢ፡- «ካአቲ ቦንቸሳኒ ኮዔ ዓሢ ጎኦቢሽ ጎይያ ዛጉዋቱ!» ጌይ ጌይ ዒላቶንጎ» ጌዔኔ።

10 ካአቲ ዒማና ሃማም፡- «ቃራኬ፣ ሂንዳ ዑካዲ ሩኡሬ፤ ካአቲም ማኣዓሢንታ ፓራሢንታ ገኢገሸ፣ ዩያ ኔ ሃሢ ቦንቸሲ ዴኤፒሲ ጎይያማ ዓይሁዶ ዓሢ ሜርዴኪዮሴም ማዴ፤ ዒዚ ሃሢ ካአቲም ማኣሪ ጌሎ ካር ኮይላ ዴዒ ዓኣሢር ኔ ሃሢ ታኣም ኬኤዜ ባካፓ ፔቱታዎ ዓይሱዎዎ ሲያ ጋፒሲ ዒዛም ማዴ» ጌይ ዓይሢኔ።

11 ዩያር ሃማ ካአቲም ማኣዓሢና ፓራሢያ ገኢገሸሰካፓ ማኣዓሢ ሜርዴኪዮሴ ማይሲ፣ ፓራሢያ ቶገሴኔ፤ ሜርዴኪዮሴ ፓራሢ ቶጋዛ ሃማ ዒዘኮ ቤርታ ቤርታ ዓኣዲ፡- «ካአቲ ቦንቸሳኒ ኮዔ ዓሢ ጎኦቢሽ ጎይያ ዛጉዋቱ!» ጌይ ጌይ ዔኪ ሃንቴኔ።

12 ዩካፓ ገንሣ ሃሣ ሜርዴኪዮሴ ካአቲም ማኣሪ ጌሎ ካር ሙካዛ፣ ሃማ ዑሣ ዓኣዴ ቦርሲንቴሢር ፔ ዓኣፖ ካር ዓፒላና ጉኡሊንጉ ዑካዲ ፔ ማኣሪ ዴንዴኔ።

13 ዒኣካ ዴንዳዎ ዒዘኮ ማቸና ላጎናም ዒዛይዳ ማዲንቴ ቦርሲሳ ባኮ ቢያ ኬኤዜኔ፤ ዒዘኮ ማቸንታ ጨንጮ ማዔ ዒዛ ዘራ ላጎንሢንታ፡- «ማይ ኔ ኩቻ ኔኤኒ ኔኤኮ ቢታንቶ ሜርዴኪዮሴም ዒንጋኒ ዑኩኔ፤ ዒዚ ዓይሁዴ ዓሲ ማዔሢር ኔ ዒዛ ቃዛዓኬ፤ ኔና ዒ ባሺ ዓቱዋሴ!» ጌዔኔ።

ሃማ ሃይቃንዳጉዲ ዎገንቴሢ

14 ዔያታ ዩያ ጌሰታ ጎይሣ ዓኣንቴ ካአቲም ማኣሪ ዓሸቲንቂ ማዳ ዓሳ ሙኪ ዓሰቲራ ዔኤሌ ሙዎ ቤዘ ዑኩና ሃማ ዔኪ ዴንዴኔ።

7

1 ዬያሮ ካአቲንታ ሃማንታ ላምዓሲ ዓለተኛና ዋላ ሙይ ዑሽካኒ ዴንዴኔ፤

2 ዔያታ ዋይሮ ዑዡ ዑሽካንቲ ካአቲ፡- «ዓለቲሬ! ኔ ዓይጎ ኮዓቲያ ታአም ኬኤዜ፤ ኔ ኮዔ ባአዚ ቢያ ታ ኔኤም ማዳንዳኔ፤ ታአኒ ካአታዲ ዋይሃ ዓጮኮ ሄካሢታቲያ ታ ኔኤም ዒንጋንዳኔ» ጌይ ሃሃ ያኦጮኔ።

3 ዓለቲራ ዒማና፡- «ካአቲዮ! ኔ ቤርታ ታአኒ ቦንቸንታ ዓሲ ማዒ ጴዴያ ማዔም ሸሌዑሞና ታ ያኦጮ ያኦጮ ያኦጮ ኔኤኒ ዔካኒ ዔኤዔቲ ታአኒ ሃሢ ኮዓሢ ታናንታ ታ ዴርንታ ሸምፔና ቶሊ ዓቲ ኑናንጋዳንጉዲኬ፤

4 ሃይሾ ታናንታ ታ ዴርንታ ዋዲ ጋፒሲ ባይዚሢም ኑ ሻንቸንቲ፤ ኑ ዓይሌ ማዓኒ ሻንቸንቲያታቲ ታ ዚቲ ጋዓኒ ዳንዳዓያታንቲኬ፤ ዋይቲ ጌዔቲ ዋንዴ ዬያጉዴ ባአዚታቲ ታአኒ ካአቲ ሜታሲንዳዋአያታንቲኬ!» ጌዔኔ።

5 ዬካፓ ካአቲ ዓርጂክሲሴ፡- «ዬያይዳኒ ጫርቃሢ ዋዚጉዴ ዓሲዳይ! ሃሢ ዬይ ዓሢ ዋካ ዓአይ?» ጌይ ጌኤሾ፡ ዓለተኛ ያኦጮኔ።

6 ዓለቲራ፡- «ኑኡኮ ሞርኬ ማዒ ኑ ሃይቃንዳጉዲ ዋጌሢ ሃያ ፑርቶ ዓሢ፤ ሃማኬ!» ጌዔኔ።

ሃማ ዒማና ዋኦቶንዶ ጎይሢ ባይዚ ዲቃታዮ፡- ካአቲና ጌኤሾናኮ ዓአፓ ዓአፓ ዛጊሢ ዓርቄ፤

7 ካአቲ ዒናፓ ዳጋዲ ሙዮ ሃሺ ዔቃዮ ዓአ ኬኤፃፓ ዙሎ ኬሰኪ ካአቱሞ ማአሮ ካራ ቱኮና ሚዮ ባአኮ ዴንዴኔ፤ ሃማ ዬያይዳሢሮ ካአቲ ዒዛይዳ ሜቶ ዓጋኒ ጋፒ ዔቄሢ ዒዚ ዔራዮ ዒዛ ሸምፖ ዓለቲራ ዓውሳንዳጉዲ ሸኢቃኒ ገንሢም ጋራ ዓቲ።

8 ዒዚ ዒማና ዓለቲራ ዒዛ ማአዳንዳጉዲ ጌይ ዒዛ ዴዒ ዓአ፡ ቃሚዮ ሻኦሎይዳ ባሊቲና ሎኦሚኔ፤ ቱኮና ሚዮ ዓአ ቤዛፓ ካአቲ ማዒ ጋሮ ጌላንቲ ሃማ ዬያይዲ ዓአሢ ዛጋዮ ዑሣ ዓአዴ ዳጋዲ፡- «ሃይ ዓሢ ሃይሾ ታአኮ ካአቱሞ ማአሮይዳ ታ ቤርታ ጌኤሾ ዓርቃኒ ኮዓ!» ጌዔኔ።

ካአቲ ዬማጋጋዓማና ዓሸቲሚ ማዒ ካአቲ ማአራ ማዳ ዓሳ ሃማኮ ዓአፖ ካሮ ዓፒላና ካንቄ ዓአቼኔ።

9 ዬያቶ ባአፓፓ ፔቲ ሃርቦና ጎዖሢ፡- «ካአቲዮ! ዬያ ሌሊቱዋንቲ ሃይ ሃማ፡ ኔና ሃይቢፓ ዓውሴ ሚርዴኪዮሴ ሱዲ ዋዳኒ ገኢገሺ ሚሢ ዒዛኮ ካራ ዳቄንቲ ዓአኔ፤ ዬያ ገኢገሺና ሚዮሢኮ ያዶሱማ ደንገታሚ ዋዳኬ» ጌይ ኬኤዜ።

ዬያሮ ካአተ፡- «ሃማ ዔኪ ዴንዲ ዒዞ ሚፃ ሱፁዋቲ!» ጌይ ዓይህኔ።

10 ሃማ ሜርዴኪዮሴ ሱፃኒ ገአጊሼ ሚፃይዳ ዓሳ ዒዞ ዔኪ ዴንዲ ሱፃኔ፤ ዩካፓ ካአተኮ ደጋ ማዔኔ።

8

ዓይሁዳ ፔኤኮ ሞርኮ ያላንዳጉዲ ኬኤዚንቴህ

1 ካአተ ዓርፂክሲሴ ዓይሁዳ ሞርካህ፤ ሃማኮ ቆሎ ቢያ ዒማ ኬሎና ዓስቲሮም ዒንጌኔ፤ ዓስቲራኣ ሜርዴኪዮሴ ዒዞኮ ዑኩ ዒጊኒ ማዔህ ካአተም ኬኤዜኔ፤ ዩማፓ ዓርቃፃ ሜርዴኪዮሴ ካአተ ቤርቶ ኬሰካንዳጉዲ ዓይህንቴኔ፤

2 ካአተ ፔኤኮ ዒዛሮ ማዒፃ ዔርዛ ማላታ ዓኣ ዠሊራህ፤ ሃማ ኬኤላፓ ኬሲሲ ዔኬህ ሜርዴኪዮሴም ዒንጌኔ፤ ዓስቲራኣ ሃማሮ ማዔ ባኮ ቢያ ሜርዴኪዮሴ ሱኡጌ ማዒ ቆላንዳጉዲ ዶኦሬኔ።

3 ሃህ ገንህ ዓስቲራ ካአተኮ ቶካ ሎኦሚ ዩኤኪ ዩኤኪ ሺኢቄኔ፤ ዒዞ ሺኢቄህ፡- ዓጋጌ ዜርፃ ማዔህ፤ ሃማ ዓይሁዳ ማዳኒ ማሌ ፑርቶ ጌኖ ላኣጊሳኒ ፔቲ ባኣዚ ካአተ ማዳንዳጉዲከ።

4 ዒማና ካአተ ዒዞም ፔኤኮ ሞርቆ ኮኦሎ ዳቄኔ፤ ዩያሮ ዒዞ ዒዞኮ ቤርታ ዔቃፃ፡-

5 «ካአተዮ! ኔና ሞዛሳፃ ማዒ ጴዴቲ፤ ሃህ ታኣማኣ ኔኤኒ ማላፃ ማዔቲ ታ ኔኤም ሺኢሻ ማሊፃ ፒዜ ማዒ ጴዴቲ ታ ኔና ሺኢቃ ባኣዚ ዓኣኔ፤ ዩይ ዓይጎዳይ ጌዔቲ ኔ ካአታዲ ሞይህ ዓጮይዳ ቢያ ናንጋ ዓይሁዳ ዓሳ ጉቤ ባይዛንዳጉዲ ዓጋጌ ዜርፃህ፤ ሃማዳታ ናኣዚ፤ ሃማ ዓይህ ዳኬ ዓይህፃ ላኣጊሻ ከኢታ ኔ ኬሲ ዳካንዳጉዲከ።

6 ዩያጉዴ ባይሲንታ ታ ዴሮ ሄላኣና፤ ገንህ ሃህ ታ ዒጊና ሞዳንታኣና ሞዲ ታ ገባንዳይ?» ጌዔኔ።

7 ዩካፓ ካአተ ዓርፂክሲሴ ጌኤሻ ዓስቲሮና ዓይሁዳ ዓህ ሜርዴኪዮሴናም፡- «ሃማ ዓይሁዳ ዓሶም ማዳ ጌኖ ማዳ ዛሎሮ ሚፃይዳ ታ ዒዞ ሱፃሲ ዒዞኮ ዓኣ ቆሎዋ ቢያ ዓስቲሮም ታ ዒንጌኔ፤

8 ሃህፃ ማፃም ካአተ ሱንፃና ፃኣፒንቴ ባኣዚና ዠሊራህ ማላቶ ጌዳ ዓይሆና ከኢታ ማዳይዳ ፔኤቁዋፃ ዓቲዋኣህሮ ዒንህሞ ሃህ ኮሺ ማዒ ጴዴ ጎይፃማ ሜሌ ከኢታ ካአተ ሱንፃና ፃኣፒ፡ ዠሊራህ ማላቶዋ ጌዳ ዓይሁዋቲ» ጌዔኔ።

9 ሜርዴኪዮሴ ዒማና ካአተኮ ፃኣፖ ባኮ ፃኣፓ ዓሶ ቢያ ዔኤሊሲ ዓይሁዳ ዓሶም፤ ሃህ ገንህ ሂንዴ ዓጮፓ ዴንዲ ዒቶጲያ ሄላንዳኣና ዓኣ ፂኤታና ላማታሚ ላንካይ ማዒ ዓጮ ሞይህ ዓሶንታ ዲማ ዲማ ቢታንታ ዓኣ ዓሶንታም ዳኪንታንዳ ከኢታ ፃኣፒሴኔ፤ ዩና ከኢታ፡-

ፔቴ ፔቴ ዓጮኮ ሙኡጮና፣ ሃሣ ፃኣፒንታ ጎይዖና፤ ዬያጉዲ ጊንሣ ዓይሁዶ ዓሶ ሙኡጮናኣ ፃኣፒ ጎይዖጉዶያ ፃኣፒንቴኔ፤ ዬይ ያኣዴ ማዲንቴሣ ሲዋኔ ጌይንታ ሃይሣሳ ዓጊና ጭሬንቴ ላማታሣ ሃይሣሳ ኬሎናኬ።

10 ሜርዴኪዮሴ ዬያ ኪኢቶ ቢያ ካኣቲ ዓርጭኪሲሴ ሱንዖና ፃኣፒሲ ካኣቲ ማኣራፓ ኬሰኬ ኪኢታ ማዒዖ ዔርዛ ማላቶዋ ጊዳ ዓይሣኔ፤ ዬይ ኪኢቶ ዋርቃታ ካኣቱሞ ማኣሮይዳ ዛጊ ሙኡዚ ዲቾና ሩኡሪ ጳሽካ ፓራሣ ቶጊ ጳሽካ ዓሶ ዑፃ ዳኪንቴኔ።

11 ዬና ካኣቲ ማኣራፓ ኬሰኬ ኪኢቲላ ዓይሁዶ ዓሳ ናንጋ ካታሞይዳ ቢያ ቡኪንቲ ፔ ጊዳ ሙካ ባኮ ዖሊ ማሃኒ ዳንዳዒሳ ቢታንቶ ዔያቶሞ ዓንጋያኬ፤ ዬይ ቢታንታ ዓይጎ ፃጺፓኣ ማዖሞ ዓጨፓ ዔያቶኮ ላኣሎንታ ናኣቶንታ ባይዛኒ ሙካ ዖልዚ ዓሲ ዔያታ ዖሊ ባይዛንዳጉዲ፣ ዋዲያ ጋፒሳንዳጉዲ፤ ጊንሣ ሃሣ ዔያቶ ሞርኮኮ ዓኣ ባኮዋ ዲዒ ዔካንዳጉዲ ዓንጊንቴያኬ።

12 ዬይ ካኣቲ ዓይሣያ ማዔ ዓይሣፃ ዓዳሬ ጌይንታ ታጶ ላሞዓሳ ዓጊኖኮ ታጶ ሃይሣሳ ኬሎና፤ ጊይፃ፡- ዓይሁዶ ዋዲንታንዳጉዲ ጌይንቴ ኬሎ ፓርሴ ዓጮ ካኣቲ ካኣታዲ ዋይሣ ዓጮ ጉቤሣዳ ፔጌና ኬኤዚንቴሞ ማዶይዳ ፔኤቃንዳጉዲ ዓይሣንቴኔ።

13 ዬይ ዓይሣፃ ቢያ ዓጮይዳ ዋጌ ማዒ ዴሮሞ ኬኤዚንቴሞ ዓይጎ ዓሲያ ማዖሞ ቢያ ዔራንዳጉዲ ማዲንቴኔ፤ ዔካ ቢያ ያኣዴ ማዔሣረ ዬና ኬሌላ ሄላዛ ዓይሁዶ ዓሳ ፔ ሞርኮ ኮሚ ኮይሳ ባኣዚ ማዲንዳጉዲ ዔያቶሞ ጊኢጋያ ማዔኔ።

14 ፓራሣ ቶጌ ዓሳ ዒማና ካኣቲ ዓይሣሞ ዬያ ኪኢቶ ዔኪ ፓራሣ ቶጋዖ ሩኡሪ ጳሽኬኔ፤ ዬይ ካኣቲ ዓይሣ ዓይሣፃ ካኣቲ ካኣታዲ ዴዒ ዓኣ ካታሞ፡ ሱኡሳይዳኣ ዴሮሞ ፔጌና ኬኤዚንቴኔ።

15 ሜርዴኪዮሴያ ዒማና ጮልዔና ቦኦሬ ማዔ ካኣቱሞ ማኣራ ማይንቶ ማኣዖ ማይንቲ፣ ጋላፒ ዴኤፒ ኮኦቴ ጊዳ ማይንቲ፤ ሃሣ ሚርጌ ሚዛጳያ ቦንቾሮ ቶኦካ ዓሳ ባኮ ዋርቁና ኮሾናያ ዓጊ ካኣቱሞ ማኣራፓ ዓሶ ፔጎ ኬሰኬኔ፤ ዬያሮ ሱኡሳ ካታሞይዳ ዒላሺሣና ዋዛፓ ዔቄያና ዴግ ጌዔ ዑኡሲ ዋይዚንቴኔ።

16 ዬይ ዓይሁዶ ዓሶሞ ኮሹሞና ዋዛና፤ ጊንሣ ሃሣ ቦንቾሞ ማዔኔ።

17 ዒማና ዓይጎ ዓጨዳኣ ማዖሞ ካታሞይዳ ዬይ ካኣቲ ኪኢታ ናባቢንቴ ቤዛ ቢያይዳ ዓይሁዶ ዓሶሞ ዴኤፒ ኮሹሞና ዋዛና ማዔኔ፤ ዬያይዳፓ ዔቄያና ዓሳ ዓይሁዶ ዓሶ ዒጊጨ ሜሌ ዴሮ ማዔ ዓሶፓ ሚርጌ ዓሲ ዓይሁዶ ካኣቶይዳ ጌሌኔ።

9

ዓይሁዳ ፔኤኮ ሞርኮ ዎዲ ባይዜህ

1 ዓዳሪ ጌይንታ ዓገኔሎኮ ታጾ ሃይሃሳ ከላ ሄሌኔ፤ ዬና ከላ ዓይሁዳኮ ሞርኮ ማዕ ዓሳ ቢያ ዓይሁዳ ዓሶ ፔ ዳማ ጌልዛንዳጉዲ ካኣቲ ዓይህ ዓይህያ ኩንህኒ ገአገንቴ ከሎኬ፤ ጋዓንቴ ዬይ ሃይሳ ገንህ ሸርቲ ዓይሁዳ ዓሳ ዔያቶ ያሊ ባሽ ከሊ ማዕኔ።

2 ካኣቲ ካኣታዲ ዎይህ ዓጮ ካታሞይዳ ካታሞይዳ ዓይሁዳ ዓሳ ፔኤኮ ናንጎ ጉርዶይዳ ቢያ ዔያቶ ባይዛኒ ኮዓ ዓይጎ ዓሲዳኣ ያልዚ ቡላኒ ዳንዳዓ ጎይህኒ ገአገንቴ ዳዔኔ፤ ቢያ ቤዛ ናንጋ ዳሪ ጉቤ ዔያቶ ዒገጩህሮ ዓይጎ ዓሲያኣ ዔያቶ ያላኒ ጫርቁባኣሴ።

3 ዬያ ሌሊቱዋንቴ ዓጮ ዓጮ ዎይህ ዓሳንታ ዳማ ዳማ ሱኡጎንታ ካኣቲ ዶኦ ፔ ማዶሞ ጌህ ዓሳኣ ጉቤ ዓይሁዳ ማኣዴ፤ ዬያ ዔያታ ማዳህ ማርዳኪዮሴ ዒገጩኬ።

4 ማርዳኪዮሴ ካኣቲ ካኣታዲ ዎይህ ዓጮይዳ ካኣቱሞ ማኣራ ዴኤፕ ቢታንቶ ዒንገንቴ ዓሲ ማዕህኒና ዎልቃዲያ ዶዲ ዶዲ ዴንዳህ ዔርቴ።

5 ዬያሮ ዓይሁዳ ዓሳ ፔ ሞርኮ ኮዔ ባኣዚ ማዳኒ ዳንዳዔ፤ ጩንቾ ዓፓሮናኣ ዓሶ ዎዲ ዎዲ ኩርሴ።

6 ዔያታ ዒማና ካኣቲ ካኣታዲ ዳዔ፣ ሱኡሳ ካታሞይዳ ሌሊ ዶንጎ ጄኤታ ዓሲ ዎዲ ኩርሴ።

7-10 ዬያ ዎዲንቴ ዓሶ ባኣካ፡- ፓርሻንዳታ፣ ዳልፖኔ፣ ዓሰፓታ፣ ፓራታ፣ ዓዳሊያ፣ ዓሪዳታ፣ ፓርማሽታ፣ ዓሪሳዬ፣ ዓሪዳዬንታ ዎይዛታ ጌይንታ ሃሜዳታ ናኣዚ ዓይሁዳኮ ሞርካህ ማዕ ሃማ ናኣታኣ ዓኣኔ፤ ዓይሁዳ ዓሳ ዬያ ቢያ ማዳያ ጋዓንቴ ዓሶኮ ዓኣ ባኮ ቡሪባኣሴ።

11 ዬኖ ከሎ ዎዲንቴ ዓሶኮ ማርጉማ ዎኣዴታቴያ ካኣቲሞ ዒማና ከኤዚንቴ።

12 ዬያሮ ጌኤሾ፡ ዓስተሮሞ ካኣቲ፡- «ሃይሾ ዓይሁዳ ዓሳ ታኣኒ ካኣታዲ ዳዔ ካታሞ፡ ሱኡሳይዳ ሌሊ ዎዴ ዓሶኮ ማርጉማ ሃማኮ ታጾ ዓቲንቆ ናኣቶ ገዳ ቃሶዛ ዶንጎ ጄኤታ ሄሌኔ፤ ዳማ ዳማ ዓጫ ዔያታ ዎዴ ዓሳ ዬያቶይዳፓ ዑህ ዓኣዴ ባሹዋ ዓታዓኬ፤ ሂንዳ ሃህ ማሌ ኔ ዓይጎ ባኣዚ ኮዓይ? ኔኤሞ ታ ኩንህንዳኔ፤ ኔ ኮዓ ባኮ ታኣሞ ከኤዜ፡ ታ ዒንጋንዳኔ!» ጌዔ።

13 ዓስተራ ዒማና፡- «ኔና፡ ካኣቲ ዎዛሳያ ማዒ ጴዴያታቶ ሱኡሳ ካታሞይዳ ናንጋ ዓይሁዳ ሃኖ ማዴማጉዲ ዚሮዋ ዒማይደሞ

ዔያቶ ሂንዳ ዓይህ፤ ሃሣ ሃማኮ ታጾ ዓቲንቆ ናኣቶ ሌዛ ሚህዳ ሱዲንታንዳጉዲ ዓይህ» ገዔኔ።

14 ዬይ ቢያ ማዲንታንዳጉዲ ካኣቲ ዓይህኔ፤ ሱኡሳ ካታሞይዳ ላሚ ሃሣ ኪኢታ ዳኪንቴኔ፤ ሃማኮ ታጾ ዓቲንቆ ናኣቶ ሌዛ ዓሲ ቢያ ዳንቃንዳጉዲ ፔጋኣ ሱዲንቴኔ።

15 ዬይሮ ዓዳሬ ገይንታ ዓገኔሎኮ ታጾ ያይዳሳ ኬሎና ሱኡሳይዳ ናንጋ ዓይሁዳ ሃሣ ዋላ ቡኪንቲ ያልዚሞ ገኢገንታዎ ቃሲ ሃይሃ ዌኤታ ዓሲ ዋዴኔ፤ ያዲ ዔያታ ማዴቴያ ዓሶኮ ዓኣ ባኮ ሃሣኣ ዔያታ ቡሪባኣሴ።

16 ዬይይዲ ካኣቲ ዋይሃ ዓጮ ጋራ ዓኣ ዓይሁዳ ቢያ ፔቱሞና ዋልቆ ፔኤኮ ደዲሺ ዔቂ ዔያቶ ባንህ ሙካ ሞርኮ ፔኤኮ ያሌኔ፤ ዔያቶ ዒፃ ዓሶፓ ላንካይታሚ ደንሳ ሺያ ዓሲ ዋዲ፣ ዔያቶኮ ሞርኮ ኩጫፓ ፔና ዓይሴኔ፤ ያዲ ማዔቴያ ፔቱታዎ ዔያታ ዓሲኮ ዓኣ ባኣዚ ቡሪባኣሴ።

17 ዬይ ያዲ ማዲንቴህሂ ዓዳሬ ገይንታ ዓገኖኮ ታጾ ሃይሃሳ ኬሎናኬ፤ ሄሊሴ ታጾ ያይዳሳ ኬሎና ጋዓንቴ ፔቱታዎ ዓሲ ዋዲሞ ዋዛ ኬሊ ማሂ ቦንቺ ዔያታ ፔኤቄኔ።

18 ሱኡሳ ካታሞይዳ ናንጋ ዓይሁዳ ጋዓንቴ ታጾ ሃይሃሳ ኬሎንታ ታጾ ያይዳሳ ኬሎንታይዳ ቢያ ዓሲ ዋዲ ፔኤቃዎ ታጾ ደንጋሳ ኬሎና ሃውሹሂሮ ዬዮ ታጾ ደንጋሳ ኬሎና ዋዛዲ ቦንቺ ፔኤቄኔ።

19 ማሌ ዳኮ ዳኮ ካታሞይዳ ናንጋ ዓይሁዳ ዓዳሬ ዓገኖኮ ታጾ ያይዳሳ ኬሎ ዋዛዲ ቦንቺ ኬሊ ማሂ ሙኡዚ ሙዒ፣ ዑሺያ ዑሽኪ፤ ገንህ ሃሣ ዋለሞ ሙዎ ባኣዚያ ዒንገ ዒንገ ቦንቺኔ።

ፑሪሜ ጎዎ ቦንቺ ኬሎ

20 ማርዳኪዮሴ ዬያ ማዲንቴ ሃይሶ ቢያ ፃኣፒ ፓርሴ ዓጮ ካኣቲ ዋይሃ ዓጮ ቢያይዳ ዑኬያ ማዎም ሃኬይዳ ናንጋ ዓይሁዳ ዓሶም ኪኢታ ዋርቃታ ዳኬኔ።

21 ሌዓ ሌዓ ዓዳሬ ዓገኖኮ ታጾ ያይዳሳ ኬሎና ታጾ ደንጋሳ ኬሎ ዋዛዲ ቦንቺንዳጉዲ ዔያቶም ዒዚ ኬኤዘኔ።

22 ዬንሂ ኬሎንሂ ዓይሁዳ ዓሳ ያልቲ፣ ፔ ሞርኮ ኩጫፓ ዓቲ ሃውሽ ዳንቄ ኬሊኬ፤ ዔያቶኮ ያዩዎንታ ሃጎኣ ዋዛ ባኣ ዓሲ ማዒ ዔያታ ዳዔሂፓ ዋዛዳ ዓገና ዒዘይዳኬ፤ ዬንሂ ኬሎንሂ ዔያታ ቦንቺ ሙኡዚያ ሙዒ፣ ዑሺያ ዑሽኪ ዑሽኪ ዋዛዲ፤ ሃሣ ገንህ ዋለሞ ሙዎ ባኣዚ ዒንገ ዒንገ፣ ማንቆ ዓሶማኣ ዔኤቢ ዒንጋንዳጉዲ ዔያቶም ኬኤዘንቴኔ።

23 ይኛ ዓይሁድ ዓሳ ሜርዴኪዮሴ ዔያቶ ዓይህ ዓይህያ ዔኬኔ፤ ይያይዱ ዔርቲ ቦንቸዋ ሌዓ ሌዓ ቦንቸኒ ዔኬዔኔ።

24 ይኛ ዋደና ዓይሁድኮ ሞርካህ፤ ዓጋጌ ዜርፃህ፤ ሃሜዳታ ናኣዚ፤ ሃማ ፑሪሜ ጌይንታ ዒፃህ ዓገ ዓይሁዳ ዓሲ ቢያ ዓጫፓ ባይቃንዳጉዲ ባይዘንደ ኬሎ ዔራኒ ማሌኔ።

25 ጋዓንቲ ዓስተራ ካኣቲ ቤርቶ ሺኢኬም፤ ካኣቲ ዓይሥህ ፃኣፒ ኬሲ ዳኬኔ፤ ይይ ዓይህፃ ማዴ ባካ ዓይጎዳይ ጌዔቲ ሃማ ዓይሁድ ዓሰ ባይዘኒ ማሌ ጌኖ ማሊያ ዒዛ ባንህ ሺርሼኔ፤ ዒዛንታ ዒዛኮ ታጶ ዓቲንቆ ናኣቶንታ ሚህዳ ዓሳ ሱጼኔ።

26 ይንህ ቦንቸ ኬሎንህ «ፑሪሜ» ጌይንቲህ ይያርኬ፤ ሜርዴኪዮሴ ዳኬ ከኢቶ ጎይፆና፤ ሃህ ገንህ ዔያታ ፔ ዓኣፖና ዛጌ ባኮንታ ዔያቶ ሄሌ ባኮዋ ቢያ ዔያታ ማሊ ጳቂህ፤

27 ዔያቶንታ ዔያቶኮ ዜርፆንታ ዓይሁዳ ዓሲ ማዓኒ ኮዓ ዓሲም ቢያ ዳምቤ ማሂ ይኖ ቦንቸ ዓርቄኔ፤ ይያ ቦንቸ ሌዓ ሌዓ ጌይንቲ ዋደማ ሄላዛ ሜርዴኪዮሴ ዔያቶ ዓይህ ጎይፆና ይንህ ላምፆ ኬሎንህ ዋሉዋፆ ቦንቸኔ።

28 ይንህ ፑሪሜ ኬሎንህ ሸይንቶ ፃጶይዳ ፃጶይዳ፤ ፔቲ ፔቲ ማኣርይዳ፤ ዓጮይዳ ዓጮይዳ፤ ገንህ ሃህ ካታሞይዳ ካታሞይዳ ቦንቸንታንዳጉዲ ጌይንቲኔ፤ ይንህ ኬላ ቦንቸንቲዋፆ ዓታኒ ኮይሱዋሴ፤ ዔያቶኮ ዜርፆ ይያ ጳቂህ ቦንቸ፤ ይይ ቦንቸ ባይቁዋኣያ ማዓንዳጉዲ ማዲንቲኔ።

29 ይያ ቢያ ባኮኮ ገንፃ ዓቢሃይሌ ናኣ፤ ጌኤሻ፤ ዓስተራ ሜርዴኪዮሴና ዋላ ማዒ ፑሪሜ ቦንቸ ዛሎ ሜርዴኪዮሴ ቤርታ ፃኣፒ ዳኬ ከኢቶ ደዲሺ ዒዛኮ ዓኣ ቢታንቶዋ ዔርዛ ከኢታ ዓርቄ ዋርቃታ ፃኣፒ ዳኬኔ።

30 ይና ከኢታ ፃኣፒንቲህ ዓይሁድ ዓሰም ፃኣፒንቲያ ማዓዛ ጌዳፓ ዔኪ ፃኣፖናህ ጋዓንቲ ፓርሴ ዓጮ ካኣቲ ዋይህ ዓጮይዳ ዓኣ ጸኤታና ላማታሚ ላንካይ ማዓ ዓጮም ቢያ ዳከንቲኔ፤ ዋርቃቲሎኮ ዴኤፖ ከኢታ ዓይሁድ ዓሰም ኮሹሞንታ ቃራ ናገጌ ዔያታ ናንጋንዳጉዲ ዓኣ ማሊህ ዓኣያኬ።

31 ይኖና ዋላ ካንህጋፓ ይያኮ ቤርታ ሙኡዚ ሃሺህ ዳምቤንታ ፆዬህ ዳምቤያ ዔያታ ኬሴ ጎይፆ ይንህ ፑሪሜ ኬሎንህ ዔያቶዋ ማፆም ሃገ ዔያቶ ገንፃፓ ኬሰካንዳ ዜርፆኣ ሌዓ ሌዓ ቦንቸንዳጉዲ ዔያቶም ላታያኬ፤ ይይ ዓይህፃ ጌኤሻ፤ ዓስተሮንታ ሜርዴኪዮሴንታ ፔቲ ዒኔና ገኢጊ ላምዓህ ዳኬያኬ።

9:24 ዓስተ. 3:7።

32 ጥሪህ ስንጃንዶ ዎጎና ዳምቦና ዛሎ ከኤዚንቴህ ደዲሻኒ ጌኤሻ፣ ዓሰተራ ዳኬ ከኢቶ ዓይህፃ ደመ ማዔ ቢራና ጌይንታ ማሪንታ ባኮይዳ ፃኣፒንታንዳጉዲ ማዲንቴኔ።

10

ካኣተ ዓርፄክሲሴና ማርዳኪዮሴናኮ ስንጃንቲ ዳኤፒፆ

1 ካኣተ ዓርፄክሲሴ ዒዚ ካኣታዲ ዎይህ ዓጮኮ ዳንዲ ዳኤፖ ባዛ ሱኮ ሄላንዳኣና ዓኣ ዓጮ ዳሮ ቢያይዳ ጌኢራ ዓጌኔ።

2 ዒዚ ማዳ ዳኤፖ ዳኤፖ ባኮንታ ሄርሺሳ ባካ፣ ማርዳኪዮሴያኣ ዒ ዳግ ዳጊዲ ዎይቲ ስንጃሴቴያ፣ ዬያ ባኮ ቢያ ከኤዛ ሃይሴ ፓርሴና ማዳኔ ካኣቶናኮ ሃይሳ ፃኣፒንታ ማፃኣፓ ፃኣፒንቴኔ።

3 ዒመና ዓይሁደ ዓህ፣ ማርዳኪዮሴ ስንጃንታ ቢታንቶ ጎይፆና ካኣተ ዓርፄክሲሴፓ ሄሊሴ ላምዓሳ ዓሲ ማዔኔ፣ ሃህ ዒዚ ዒዛኮ ዒጊና ዓይሁደ ዓሳ ዒዛ ኮሺ ስንጃ ናሽካ ዓሲ፣ ዒዛኮ ዒጊኖንታ ዜርፆንታ ኮሺ ናንጊ ናንጋንዳጉዲ ማርጌና ላቢ ማዳ ዓሲ ማዔኔ።

ጌሌዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929